



Mohlafi wa mogale!



Pumeza Ngobozana





Nageng ye nngwe, kua kgole, polaseng go be go dula letswiana la go fapana le matswiana a mangwe. Letswiana le le be le na le mafofa a go tiba a go hlafa. Molala wa lona o be o sena mafofa gomme maoto a lona a be a tletše ka mafofa.





Leina la letswiana le e be e le Mohlafi, ba mo theile
leina le ka lebaka la mafafa a gagwe a go hlafa.
Matswiana a mangwe le ona a be a theilwe maina
go ya ka mebala ya ona. Mohlafi o be a rata leina la
gagwe ka gobane le be le sa swane le a ba bangwe.
Le be le mo dira gore a ikwe a kgethegile.



Matswiana a mangwe a be a sa rate go bapala le Mohlafi.

“Mafofa a gago a befile ebile ga go na sekamo se se ka kgonago go a kama!”

“A re se keng ra bapala le yena, ke tshepha gore le go nkgga o a nkgga,” gwa realo Mošweu wa mafofa a mašwanyana, wa go ratwa ke matswiana a mangwe. Ba rata go mo šala morago tše o ka rego ke moetapele wa bona.





Mohlafi o be a lewa ke bodutu ka ge a be a dula le mmagwe fela.

Mmagwe o be a dula a mo hlohleletša go bapala le bana ba bangwe, gore ba tlwaele sebopego sa gagwe.

Go be go se bonolo ka ge matswiana a be a tšhaba ge a a batamela.



Ka letšatši le lengwe Mohlafi o be a bapala a le noši, ge letswiana la mafofa a mebalabala ya go se tlwaelege le etla go yena. A se a ka a bona letswiana la mohuta wo. “O na le mafofa a mabotse. Naa mmala wo wa ona o bitšwa eng?” gwa botšiša Mohlafi.

“Ke a leboga! Mma o re ke nna letswiana la molalatladi ka lebaka la mebalabala ya ka. Ebile leina la ka ke Molalatladi,” gwa fetola

Molalatladi a myemyela.

“Ka nnete?” gwa botšiša Mohlafi a segela fase. “Nna ke Mohlafi, ke theilwe leina le ka lebaka la mafofa a ka a go hlafa,” Bobedi ba sega.





“Naa o ka belaela ge nka swara mafofa a gago?”
gwa botšiša Molalatladi.

Mohlafi a dumela gore Molalatladi a sware mafofa a
gagwe.

Molalatladi yena a se tshepe se a se kwelego.
Mafofa a Mohlafi a

boleta go swana le a gagwe, ebile ga a nkge bjalo
ka ge a kwele.



Go tloga letšatši leo, ba ile ba ba bagwera ba mmakgonthe. E be e le la mathomo Mohlafi a e ba le mogwera mo bophelong bja gagwe. Seo se ile sa mo thabiša.



Matswiana a mangwe a be a ba duma ge ba bapala, ba kitimišana, ba tsoma diboko le dijo tše dingwe.



Ka letšatši le lengwe Molalatladi le Mohlafi ba be ba bapala kua nageng. Pekwa ya swele ya fofela kgauswi le moo matswiana a mabedi a bapalelago gona. Ya batamela kgauswi kudu gomme ya fofa fofa godimo ga dihlogo tša bona. Molalatladi o be a tšhogile e le ruri. Efela Mohlafi a mo theoša maswafo. Yena o be a sena letswalo.





Pekwa ya bula dinala tša yona tša go tšhoša e rata go swara Molatladi. Mohlafi a iphošetša gare ga Pekwa le mogwera wa gagwe.



Mohlafi a phurolla diphego gomme a šišinya mafofa a go hlafa. A lebelela Pekwa ka mahlong a re, “Lefšega tena! Ke ka lebaka la eng o hlakiša matswiana a go se be le maatla, ao a sa kgonego go itwela? Tšea nna ge, ga ke go tšhabe! Tloga mo!” gwa realo Mohlafi a kitimiša Pekwa ka maphego a gagwe a mannyane.



Pekwa ya se tshepe ditsebe tša yona. Ya fofa ka
lebelo le legolo, e tšhogile ka gobane ga se ya ka ya
tšhošetšwa ke letswiana bophelong bja yona.





Matswiana a mangwe a be a lebeletše a utamile ka letšhogo. Ba be ba kgahlegile ka go bona bogale bja Mohlafi. Ga se ba tshepa ka mokgwa wo a šireleditšego bophelo bja mogwera wa gagwe.



“Ke leboga ge o phološitše bophelo bja ka dinaleng tša Pekwa,” gwa realo Molalatladi.

“Ke segwera sa nnete seo”

“Ke ka lebaka la eng o sa tšhabe Pekwa?”
Molalatladi a botšiša.



“Ke nagana gore mafafa a ka a go hlafa a dira mehlolo.” Bobedi ba sega. Mohlafi a thabela go se swane le ba bangwe.



Letšatši le le latego, matswiana ka moka a tla go Mohlafi le Molalatladi. Ba eteletšwe pele ke Mošweu, moetapele wa bona.

“Ke kgopela go ba mogwera wa lena,” gwa kgopela Mošweu




Molalatladi a lebelela Mohlafi. Yena a myemyela a re, “Go lokile! O ka ba mogwera wa rena.”

“Ke kgopela go swarelwa ka tše mpe ka moka tšeo ke di boletšego,” gwa realo Mošweu. Mohlafi a dumela ka hlogo.



Go tloga ka letšatši leo, matswiana ka moka a
bapala mmogo. Mohlafi a ba ruta go phuruolla
maphego le go šišinya mafofa go itšhireletša go
Pekwa.





Pekwa a se sa ba hlakiša gape ... mohlomongwe o ile dipolaseng tše dingwe. Mohlafi o be a se sa lewa ke bodutu. Matswiana a mangwe a tlogela go mmitša ka maina a mabe, ba thoma go mmitša Mohlafi wa mogale.

